

地 140.79

42

6

平三

卷十二

人物志二

壽光縣志

荷澤宋憲章
署



壽光縣志卷之十二

人物志



地方以人物而重濟北英賢襄陽耆舊傳之久矣本邑人材代興
焜耀千禩劉志分門立傳表章先哲示範後昆爲閭里之榮亦邦
家之光自清嘉慶迄今一百有餘年陽河孕蓄丹水菁英明達繼
起詩書之澤流風未沫鬱之又久其將有名世應運而生者乎女
子懿行前志所載不亞士夫窮簷蔀屋壺教猶隆彤管振書今不
遜古夫婦之倫一與之齊終身不改之死靡他視柏舟之遇殆有
難者嗚呼紀叔姬之盼蠻遠矣封蔭以有事功而得耆壽亦古三
壽光縣志

卷十二 人物志一

老之遺因以表附

事功

東漢

滕撫字叔輔北海劇人初仕州郡遷涿令太守以其能委任郡職
兼領六縣在事七年道不拾遺順帝末揚徐盜賊羣起磐牙連歲
建康元年九江范容周生等反據歷陽遣御史中丞馮緄將兵督
揚州刺史尹耀九江太守鄧顯討之耀顯軍敗被殺又陰陵人徐
鳳馬勉等復寇郡縣殺略吏民鳳稱無上將軍勉稱皇帝築宮於
當塗山中建年號置百官明年廣陵賊張嬰等復聚衆數千人反

據廣陵朝廷博求將帥三公舉撫有文武才拜爲九江都尉助馮緄合州郡兵數萬人討之撫等進擊大破斬馬勉范容周生等千五百人徐鳳將餘衆攻燒東城縣爲應募下邳人謝安所擊斬封安平鄉侯邑三千戶拜撫中郎將督揚徐二州事撫復進擊張嬰斬獲千餘人又歷陽賊華孟自稱黑帝攻九江殺郡守撫乘勝進擊破斬孟等三千八百級虜獲七百餘人牛馬財物不可勝算於是東南悉平振旅而還以撫爲左馮翊除一子爲郎撫所得賞賜盡分於麾下性方直不交權勢宦官懷憤及論功當封太尉胡廣時錄尚書事承宦官旨奏黜其功天下怨之卒於家

後漢書本傳
通志名臣傳

壽光縣志

卷十二 事功

三國

孫乾字公祐劉先主領徐州鄭玄薦之辟爲從事後隨從周旋先主之背曹公遣乾自給袁紹將適荊州乾又與麋竺俱使劉表皆如意指後表與袁尚書說其兄弟分爭之變曰每與劉左將軍孫公祐共論此事未嘗不痛心入骨相爲悲傷也其見重如此先主定益州乾自從事郎中爲秉忠將軍見禮次麋竺與簡雍等頃之

卒

劉志註蜀書祇言乾爲北海人據後漢郡國志青州刺史部北海國屬縣一十有八乾之爲壽光人與否似無確證姑仍之

國淵字子尼樂安蓋

山東通志云今壽光縣境

人也師事鄭玄從邴原管寧等

避亂遼東既還舊土太祖辟爲司空掾屬每公朝論議常直言正

色退無私焉太祖欲廣置屯田使淵典其事淵屢陳損益相土處民計民置吏明功課之法五年中倉廩豐實百姓競勸樂業太祖征關中以淵爲居府長史統留事田銀蘇伯反河間銀等既破餘黨皆應伏法淵以爲非首惡請不行刑太祖從之賴以得生者千餘人破賊文書舊以一爲十及淵上首級如其實數太祖問故淵曰夫征討外寇多其斬獲之數者欲以大武功且示民聽也河間在封域之內銀等叛逆雖克捷有功淵竊恥之太祖大悅遷魏郡太守時有投書誹謗者太祖疾之欲必知主淵請留其書不宣露其書多引二京賦淵敕功曹曰此郡旣大今在都輦而少學問者

壽光縣志

卷十二 事功

三

其簡開解年少欲造就師功曹差三人臨遣引見訓以所學未及二京賦博物之書也世人忽略少有其師可求能讀者從受之又密喻旨旬日得能讀者遂往受業吏因請使作箋比方其書與投書人同手收攝案問具得情理遷太僕居列卿位布衣蔬食祿賜散之舊故宗族以恭儉自守卒官

三國志魏書列傳

按傳內樂安國名非郡名後漢壽光屬樂安國考漢地里有

沂水縣西北百里蓋邑莊是此則明繫樂安爲另一蓋縣可知

詳檢山東通志沂水縣沿革表蓋縣魏屬東安郡晉屬東莞郡

計云三國志國淵傳樂安蓋人宋志蓋縣晉太康地志屬樂安樂安之有蓋縣山東通志所據宋志及晉太康地志至爲分明與東安東莞之蓋異地同名無疑也再考全謝山七校水經注本所校巨洋水又東北逕益縣故城東之文按戴山七校水永

樂大典本俱爲益縣益縣實校爲蓋縣與國淵傳相合且水經注此
光境在漢季及三國時當有蓋縣與國淵傳相合且水經注此
乃下文所引晏謨說南北徙豐城者亦卽改蓋縣爲南豐南豐故城
豐城詳沿革及古蹟志則似樂安之蓋縣在今地爲豐城矣新
山東通志注明在壽光縣境者其以此歟續在山東考古錄對於
水經注蓋縣故城與晏謨所云去齊城五十里之說致疑與里
數不符又或疑蓋與樂安不接壤樂字爲東字之訛者不均可
釋然乎惟新山東通志沿革門於壽光縣漢魏間未增蓋縣之
目以孤証闕疑故本志亦遵之補錄國淵傳附考於傳末以備
一說云

滕胤字承嗣伯父耽父胄與劉繇州里通家以世亂渡江依繇孫
權爲車騎將軍拜耽右司馬胄善屬文待以賓禮皆不幸短命權
爲吳王追錄舊恩封胤都亭侯少有節操美儀容弱冠尙公主年

壽光縣志

卷十二 事功

四

二十起家爲丹陽太守徙吳郡會稽所在見稱太元元年權寢疾
詣都留爲太常與諸葛恪俱受遺詔輔政孫亮卽位加衛將軍恪
將悉衆伐魏胤諫曰君以喪代之際受伊霍之託入安本朝出摧
強敵名聲振於海內天下莫不震動萬姓之心冀得蒙君而息今
猥以勞役之後興師出征民疲力屈遠主有備若攻城不克野略
無獲是喪前勞而招後責也不如案甲息師觀隙而動且兵者大
事事以衆濟衆苟不悅君獨安之恪不從以胤爲都下督掌統留
事胤晝接賓客夜治文書或通曉不寐後恪爲孫峻所殺胤以恪
子竦妻父辭位峻曰竦禹罪不相及滕侯何爲峻胤雖內不沾治

而外相包容進胤爵高密侯共事如前峻欲城廣陵朝臣知其不可而畏莫敢言惟胤諫止之未幾峻死使孫綝代知朝政時呂據率師侵魏未及淮聞之大怒與諸督將連名共表薦胤爲丞相綝更以爲大司馬代呂岱住武昌據因使人報胤欲共廢綝綝聞之表言胤反使將軍劉丞率兵騎急攻圍胤胤顏色不變談笑若常或勸胤引兵至蒼龍門將士見公出必委綝就公時夜已半胤特與據期又難舉兵向宮故未從比曉據不至綝兵大集遂殺胤及將士數十人據亦在外自殺後綝廢吳主亮立孫休休因臘會誅綝下詔曰諸葛恪滕胤呂據蓋以無罪爲孫綝兄弟所見殘害可

壽光縣志

卷十二 事功

五

爲痛心促皆改葬各爲祭奠其罹恪等事遠徙者一切召還

三國志胤

劇人官至太宰加衛將軍

苻秦

王猛字景略北海劇人也家於魏郡少貧賤以鬻畚爲業嘗負畚洛陽有一人貴買其畚自言家去此無遠可隨我取直猛利其貴從之至深山見一父老踞胡牀而坐左右十許人引猛進拜父老曰王公何緣拜也乃十倍償畚直遣人送之猛旣出顧視乃嵩高山也猛博學好兵書氣度雄遠細事不干其慮時人罕能識也惟徐統奇之召爲功曹不應隱於華陰山桓溫入關猛被褐詣之捫

蝨而談當世之務旁若無人溫異焉問曰吾奉天子命仗義討逆三輔豪傑未有至者何也猛曰公不遠千里深入敵境今長安咫尺而不渡灞水百姓未見公心所以不至溫默然徐曰江東無卿比也將還請與俱南猛還山諮師師曰卿與桓溫豈並世哉在此自可富貴何必遠猛乃止苻堅聞猛名遣呂婆樓招之一見如舊友語及興廢大事異符同契若玄德之遇孔明也初授中書侍郎時始平多枋頭西歸之人豪右縱橫劫盜充斥乃轉猛始平令猛下車鞭殺一吏百姓上書訟之檻車徵下廷尉詔獄堅親臨問猛曰臣聞宰寧國以禮治亂邦以法陛下不以臣不才任臣在劇邑

壽光縣志

卷十二 事功

六

謹爲明君摘除凶猾始殺一姦餘尙萬數若以臣不能窮殘盡暴者敢不甘心鼎鑊以謝孤負酷政之刑臣實未敢遽受堅謂羣臣曰王景略固是夷吾子產之儔也赦之年三十歲中五遷權傾內外尙書仇騰丞相長史席寶數譖毀之堅怒黜騰寶自是莫敢復言後率諸軍討慕容暐號令嚴明師無私犯軍還以功進封清河郡侯入爲丞相中書監久之復授司徒軍國內外諸事無巨細悉歸之猛剛明清肅善惡著白放黜尸素顯拔幽滯勸課農桑練習軍旅無罪而不刑無才而不任由是國強兵富垂及升平猛之力也廣平麻思流寓關右因母喪歸葬請還冀州猛謂曰便可速裝

是暮已符卿發遣及始出關郡縣被符管攝其令行禁止事無留
滯類如此堅嘗從容謂猛曰卿夙夜匪懈憂勤萬幾若文王得太
公吾將優游以卒歲猛曰不圖陛下知臣之過臣何足以擬古人
堅曰以吾觀之太公豈能過也嘗勅其太子宏長樂公丕曰汝事
王公當如事我猛後寢疾堅親爲祈郊廟社稷分遣近臣徧禱河
嶽疾未瘳乃大赦其境內殊死以下及危篤堅親至猛第視疾訪
以後事猛曰晉雖僻處江南然正朔相承上下安和臣沒之後願
無以晉爲圖鮮卑西羌我之仇讎終爲大患宜漸除之以便社稷
言終而卒時年五十一堅哭之慟比斂三臨謂太子宏曰天不欲

壽光縣志

卷十二 事功

七

使吾平一六合耶何奪吾景略之速也贈侍中丞相給東園溫明

祕器葬禮一依漢大將軍故事諡曰武侯朝野巷哭三日

晉書本傳

按經濟類編武功類載王猛寢疾秦王堅親爲之祈禱猛疾少瘳上疏曰不圖陛下以臣之命而虧天地之德開關以來未之有也臣聞報德莫如盡言謹以垂歿之命竊獻遺欸陛下威烈振乎八荒聲教光乎六合九州百郡十居其七平燕定蜀有如拾芥夫善作者不必善成善始者不必善終是以古先哲王知功業之不易戰戰兢兢如臨深谷伏惟陛下追蹤前聖天下幸甚堅覽之悲慟後儒謂三代下亂世之臣識大體者孔明王猛二人而已亮仕漢而心乎漢猛不仕晉而心乎晉亮臨終不輟伐魏之師猛臨終諫止伐晉之舉其事雖異其心則同也晉書本傳無此疏故附於此

晉

王鎮惡北海劇人祖猛仕苻堅任兼將相父休河東太守鎮惡年

十三而苻氏敗寓食黽池人李方家方善遇之謂方曰若遇英雄
主要取萬戶侯當厚相報方曰君丞相孫人材如此何患不富貴
至時願見用爲本縣令足矣後隨叔父曜歸晉客荊州頗讀諸子
兵書喜論軍國大事騎射非所長而縱橫善果斷劉裕伐廣固鎮
惡時爲臨澧令或薦之裕召與語異焉因留宿且謂諸佐曰鎮惡
王猛孫所謂將門有將卽以署前部賊曹拒盧循有功封博陸縣
五等子劉裕謀討劉毅轉鎮惡參軍事使率龍驤將軍蒯恩百舸
前發鎮惡受命便行揚言毅兄藩劉兗州上毅謂爲信不知見襲
鎮惡去江陵城二十里舍船步上船留一二人對船岸上置旗鼓

語所留人曰計我將至城便長嚴令後有大軍狀又分隊在後令
燒江津船鎮惡徑前襲城津戍及百姓晏然不疑將至城逢毅要
將朱顯之馳前問藩所在軍人答曰在後及至軍後不見藩又望
見江津船被燒而鼓聲甚盛知有變急躍馬告毅令閉城門鎮惡
亦馳入便因風縱火燒大城南門及東門又遣人以詔及赦並裕
手書凡三函示毅毅皆燒不視及短兵接戰鎮惡軍人與毅所將
且鬥且語知劉裕在後人情離沮毅從大東門出奔牛牧佛寺自
縊鎮惡平江陵後二十日大軍方至以功封漢壽縣子及劉裕北
伐爲鎮西諮議行龍驤將軍領前鋒將發前將軍劉穆之曰昔晉

文王委蜀於鄧艾今亦委卿以關中卿其勉之鎮惡曰咸陽不克
誓不濟江既入賊境戰無不捷破虎牢及柏谷塢進次黽池造故
人李方家升堂見母厚加酬賚卽授方黽池令方軌前進徑據潼
關會大軍亦至謀進取計鎮惡請率水軍自河入渭直至渭橋所
乘皆蒙衝小艦行船者悉在內泝渭而進艦外不見有行船人北
土素無舟楫莫不驚以爲神鎮惡既至命將士食畢便棄船登岸
渭水急船悉逐流去鎮惡曰此是長安城北門外去家萬里而舫
乘衣糧並已逐流惟宜死戰可立大功乃身先士卒卽陷長安城
城內六萬餘戶鎮惡撫慰初附號令嚴肅於灊上奉迎劉裕裕乃

壽光縣志

卷十二 事功

九

留第二子桂陽公義真爲安西將軍雍秦二州刺史鎮長安鎮惡
以征虜將軍領安西司馬馮翊太守委以扞禦之任及大軍東還
赫連勃勃逼北地義真遣中兵參軍沈田子拒之虜甚盛田子退
屯劉因堡遣使還報鎮惡對田子使謂安西長史王修曰公以十
歲兒付吾等當共思竭力今擁兵不進賊何由平使反言之田子
甚懼時鎮惡師涇上與田子會於傅弘之壘田子求屏人因斬之
幕下並其兄弟凡七人弘之奔告義真義真率王修王智被甲登
樓以觀變俄而田子至言鎮惡反修執田子以專戮誅焉追贈鎮
惡左將軍青州刺史及劉裕受禪追封龍陽縣侯諡曰壯傳國至

曾孫叡齊受禪國除

南北朝 北魏

王憲字顯則北海劇人祖猛苻秦丞相父休河東太守憲幼孤隨伯父永在鄴苻丕稱尊號復以永爲丞相永爲慕容永所殺憲匿於清河人家皇始中乃歸魏道武見之曰此王猛孫也厚禮待之以爲本州中正領選曹事兼掌門下太武卽位遷廷尉卿出爲上谷太守賜爵高唐子清身率下風化大行尋拜外都大官復任中都斷獄稱旨進爵劇縣侯出爲并州刺史又進北海公境內肅清及憲年老特賜錦繡布帛珍羞醴膳天安初卒年八十九諡曰康

壽光縣志

卷十二 事功

十

南北朝 北齊

王晞字叔朗小字沙彌憲之曾孫兗州刺史雲之子也幼而孝謹淹雅有風度嘗隨母兄東適海隅邢子良愛其清悟與其在洛兩兄書曰賢弟彌朗意識深遠曠達不羈簡於造次言必詣理吟詠情性麗絕當時恐足下方難爲兄不暇慮其不進也魏永安初兄暉聘梁啓晞釋褐除員外散騎侍郎晞願養母竟不受署齊神武訪朝廷子弟忠孝謹密者令與諸子遊晞首應此選隨神武到晉陽補中外府功曹參軍爲常山王演友及文宣昏逸常山王數諫大被毆撻閉口不食謂晞曰吾氣息惛然恐不復相見晞流涕曰

天道神明豈令殿下遂斃此舍至尊親爲人兄尊爲人主安可與計殿下不食太后亦不食縱不自惜不惜太后乎言未卒王強坐而飯王復錄尙書事新除官者必詣王謝職去必辭晞言於王曰受爵天朝拜恩私室自古以爲干紀朝廷文武出入辭謝宜一約絕王深納焉嘗從容謂晞曰主上起居不恆卿耳目所具吾其可以前逢一怒遂爾結舌晞因切諫曰今朝廷乃爾欲學匹夫輕一朝之命狂藥令人不自覺刀箭豈復識親疏一旦禍出理外將奈殿下家業何奈皇太后何乞且將順日慎一日王乃止及孝昭踐祚除晞散騎常侍兼吏部郎中時百官請建東宮敕未許每令晞

就東堂監視太子冠服導引趨拜孝昭斬人於前問晞曰此人合死否晞曰罪實合死但恨不得死地臣聞刑人於市與衆棄之殿廷非殺戮之所孝昭改容曰自此當爲卿改之孝昭欲以爲侍中苦辭不受或勸晞勿自疎晞曰我少年以來閱要人多矣充詘少時鮮不敗績且性實疏緩不堪時務人主恩私何由可保萬一披猖求退無地非不愛作熱官但思之爛熟耳晞性閒澹寡欲雖王事鞅掌而雅操不移在并州日良辰美景嘯詠遨遊人謂之方外司馬嘗指晉祠賦詩曰日落應歸去魚鳥見留連後晉陽陷敗避周兵東北走而不肯疾去行旅尤之晞曰莫尤我我行事若不悔

久作三公矣後卒於隋開皇元年贈儀同三司曹州刺史

以上北史本傳

通志名臣傳

南北朝

北魏

賈思伯字士休齊郡益都人世父元壽高祖時中書侍郎有學行見稱於時思伯自奉朝請累遷中書侍郎頗爲高祖所知常從征伐及世宗卽位以時從之勤轉輔國將軍任城王澄之圍鍾離也以思伯持節爲軍司及澄失利思伯爲後殿澄以思伯儒者謂之必死及至大喜曰仁者必有勇今於軍司見之思伯託以失道不伐其功時論稱其長者累遷南青州刺史初思伯與弟思同師事

壽光縣志

卷十二 事功

十二

北海陰鳳授業無資酬之鳳質其衣物時人爲之語曰陰生讀書不免癡不識雙鳳脫人衣及思伯之部送縑百匹遺鳳因具車馬迎之鳳慚不往時人稱歎焉肅宗時除右將軍涼州刺史思伯以州邊遠不樂外出辭以男女未婚靈太后不許舍人徐紇言之得改授太尉長史又除安東將軍廷尉卿思伯自以儒者不好法律希言事俄轉衛尉卿於時議建明堂多有同異惟思伯所議學者稱善又遷太常卿度支尙書轉正都官時太保崔光疾甚表薦思伯爲侍講中書舍人遂入授肅宗杜氏春秋思伯少雖明經從官廢業至是更延儒生夜講晝授性謙和輕身禮士雖在街途停車

下馬接誘恂恂曾無倦色客有謂曰公今貴重寧能不驕思伯曰
衰至便驕何常之有當世以爲雅談孝昌元年卒贈鎮東將軍青
州刺史又贈尚書右僕射諡曰文貞子彥始武定中淮陽太守

魏據

書參南北史儒林傳按是時益都
卽今治南七里古益城故列本志

後周

滕中正字普光弱冠舉進士不第周顯德中滑帥向拱奏辟爲掌
書記宋乾德五年度支員外郎侯陟表中正有材幹入爲殿中侍
御史太平興國中擢拜右諫議大夫權御史中丞振舉憲綱人以
稱職許之雍熙元年春大宴上歡甚以虛蓋示羣臣宰相言飲酒

壽光縣志

卷十二 事功

十三

過度恐有失儀之責上顧謂中正今君臣相遇有失者勿彈劾也
是冬乾明節羣臣上壽酒旣三行上目中正曰三爵之飲實惟常
禮朕與羣臣更舉一卮可乎中正曰陛下聖恩甚厚臣敢不奉詔
二年以老辭出知河南府未幾被病罷分司西京年八十四卒二
子並舉進士玄錫至刑部郎中玄晏工部郎中

劉志按語據宋史
祇云中正青州北

海人不言壽光舊
志載入今仍之

宋

于燾字彭年博學能文喜言兵慶歷中元昊數寇邊北人乘釁求
關南地丞相呂端召燾計之燾云宜治西北行宮若將親征者以

壓其謀乃以大名府爲北都二虜果請盟仁宗春秋高皇嗣未立登州岨嶠山數震燾上疏曰岨嶠極東方殆東朝未建人心搖動之象宜早定儲以安天下逮英宗入繼由齊邸人皆稱其先識燾以富弼薦爲武學教授累官至太子中舍人

舊志引澠水燕談錄

任顥字誠之宋仁宗時學究出身至衛尉丞以獻文賜第擢鹽鐵判官陝西鑄康定大錢以一當十顥言恐犯法者衆後果然夏使楊守素以納款爲名要請十一事欲去臣稱男自置椎場買賣且通青鹽增歲賜顥押伴曉以大義辭折而去出爲京西轉運使奏計京師適元昊爲其下所殺復遣守素來告哀顥問其主所以死

壽光縣志

卷十二 事功

十四

守素不能對訖去無敢肆改知鳳翔入判三司憑由司爲諒祚冊禮使采撫西夏風物山川道里出入攻守之要爲治戎精要三篇上之進直史館遷河東運使每行部必擇僚佐之賢者一人與俱凡事必與議未嘗以胥吏自隨入爲鹽鐵副使儂寇亂擢天章閣待制知潭州有宣毅卒當補軍校顥察其色動知有異執按之具服爲儂賊內應搜其家得所記潭事甚悉梟首以徇詔書褒美賜白金進龍圖閣直學士積官至戶部侍郎以太子賓客致仕卒年

七十八

見宋史本傳

元

李鉉本太原人其遠祖嘉佑時官壽光遂入籍鉉自弱冠好弓馬喜豪俠懷奇負氣不肯隨人後元初定鼎爲百人長屯駐下邳轉戰海州漣州金城五江口皆有功累遷明威將軍宣賜銀符金盃以酬其勞烏穰村之役俘馘甚衆加懷遠大將軍都統領同知博興州事頒賜優渥爲一時名將

孟過論曰鉉雄壯威勇名傳於世販豎走卒皆知其名每臨大敵身爲諸將先屢立偉功朝廷賞金帛分賜士卒略無憒惜士卒以此多之宅心仁恕雖在軍旅手不釋書尤未嘗妄殺一人不數年起白屋崇閭閻積善之報也

壽光縣志

卷十二 事功

十五

馮埒字子堅蔡州通判機之孫下邳縣令燦之子也幼通經史文筆優贍金泰和中舉進士府試魁兩路逾弱冠釋褐任山東東西路統軍司經歷元兵下幽燕取青州命爲益都路參議時州縣彫敝值歲饑埒爲之立條教明賞罰安反側招流亡櫛垢爬癢躋民小康在位二十餘年春秋七十有三卒孫涇以歲貢充吏部令史累官至嶺南湖北道肅政廉訪副使

李庭本金蒲察氏後徙居中原改姓李由濟陰來壽光至正六年以材武選累遷中書左丞東征日本遇風壞船漂流抵高麗得還宋王乃顏叛從世祖征之流矢中胸貫脅裹創復戰令軍中修百

弩俟敵仍持火砲夜入其陣敵潰散帝命庭與月兒魯蒙右軍並進遂縛乃顏以獻累官知樞密院事卒追封益國公諡武毅子大用歸德府同知大椿襲封益都萬戶

明

趙銓字景衡永樂中由貢生選任溧陽縣令在事九年政通人和百廢具舉成祖聞其賢召至闕賜衣一襲珊瑚一株寶鈔萬貫褒之官至紹興府太守

韓俊宣宗時曹欽等千餘人謀不軌俊以總旗率軍伍數百人盡誅欽等手馘三人賜世襲錦衣衛百戶

壽光縣志

卷十二 事功

十六

劉珣字叔溫叔父甄永樂中爲監察御史剛果有爲終陝西安察司副使珣生而穎悟氣識過人正統甲子年十九領鄉薦戊辰成進士改翰林院庶吉士授編修天順丁丑晉右春坊右中允日侍東宮講讀侃侃詳陳無少忌諱學士劉定之稱爲講官第一憲宗卽位以舊宮僚累遷太常寺卿兼侍讀成化丁亥預修實錄陞本寺卿明年兼侍讀學士聞母疾乞歸省母歿哀毀踰禮廬墓三年鄉人化之號其鄉曰仁孝服闋復職甲午陞吏部左侍郎猶兼經筵乙未陞兼翰林學士擢入內閣丁酉陞戶部尙書兼職如故戊戌加太子太保兼文淵閣大學士壬寅纂修文華大訓成陞謹身